



KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

08 Novembre 2019

10 Rabi'ul Awwal 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

DUAH POUR ENE GOUVERNEMENT PROPRE

Hier, le peuple mauricien fine voter pour gagne ene gouvernement pour sa cinq prochains l'années là. Nous prier Allah (swt) pou donne nous ene nouveau gouvernement ki pou travaille dans l'intérêt supérieur de la population de la République de Maurice, sans démontrer aucaine l'égo. Nous prier pour ki le communalisme disparaîte et ki nous trouve bane dimounes compétents à la tête et dans bane positions clés, bane tels dimounes ki pour gère nous pays d'ene bon façon et ki pou dirige li dans ene bon direction. Allah conne mieux ki gouvernement ki le peuple fine voter. Nous espérer et prier pour ki le nouveau gouvernement constituer so cabinet et recrute bane dimounes lor base de mérite, de connaissances et de l'expérience et non lor base de bane backing et de family-feeling [kot pas ena kit so bane proches ki protégés et ki grimpe l'échelle du succès plus vite ki les autres sans ki zot mériter].

Azordi, ena le dépouillement de bane votes et mo penser ki après Namaz *Maghrib*, nous pou capave conner ki sanlà ki pou alle gouverne nous l'île Maurice et bane les autres îles ki trouve zot sous la garde et responsabilité de Maurice pour les cinq ans à venir. Nous prier pour ki Allah élimine bane *Judas* – bane hypocrites et bane dimounes corrompu, ainsi ki bane ki content protège zot

montagnes [c'est-à-dire, bane membres de zot propres communautés religieuses] et ki incite à la haine et au communalisme au nom de la religion. **Ki Allah permette à ene gouvernement propre – la main propre, la tête haute, ki respectueux et ki doté de bane connaissances appropriées, pou gère sa pays là et pou faire li progresser et en même temps pou redresse l'économie de la bonne façon, dans l'intérêt du peuple mauricien, sans égoïsme, sans corruption et de façon louable [digne de louanges/ félicitations].** *Insha-Allah, Ameen Summa Ameen, ya Rabbul Aalameen.*

ISLAM ET LE DROIT INTERNATIONAL

Bane la loi zot bien importants dans la vie d'ene dimoune et d'ene pays. La loi ki traite de la politique étrangère appelle sa le droit international. Si nous retrace l'histoire du droit international, nous pou arrive à la conclusion ki pas exister même bane règlements strictes concernant sa zaffaire là. Même dans Ancien Rome, so la loi, couma bane les autres systèmes antiques [anciens], ti adopté à l'origine le principe de la personnalité, ce qui veut dire ki la loi de l'État ti pé applique uniquement à so citoyen. Ene étranger pas ti ena strictement aucaine droit, et à moins ki li protégé par ene traité entre so l'État et Rome, alors tous so bane di biens ti capave être saisis par n'importe ki Romain, à n'importe ki moment.

Le droit occidental, ki sorti principalement de la loi romaine, pas ti ena kit l'idée particulier lor le droit international et c'est l'Islam ki, pour la première fois, fine créé le droit international en tant ki ene discipline claire sous le terme de *Siyar* ou comportement (du chef ki pé gouverner). Bane savants musulmans fine divise le monde en:

1. Dar al-Islam (bane territoires musulmans)
2. Dar al-Sulh (bane territoires de bane relations conventionnelles, kot ena traités/ pactes avec zot) et
3. Dar al-Harb (bane territoires en guerre).

Bane musulmans zot forme ene sel communauté, avec bane liens fraternel solides. Zot tous bane frères et zot tous bizin ene sel. Bane non-musulmans dans zot bane relations conventionnelles [pactes ou alliances] avec bane musulmans zot être traités conformément à bane termes de sa bane pactes là. Bane non-

musulmans ki pas ena bane relations conventionnelles avec l'islam zot considéré sous deux l'aspects: (1) ene pays qui persécute activement bane musulmans et rénier zot le droit pou pratique et prêche zot la foi c'est ene l'ennemi de l'islam, que ce soit sa pays là li en guerre ou non; (2) mais si sa pays là permette à bane musulmans pou jouir de la liberté de religion et de culte, alors sa pays là li pas pou vine responsable d'ene la guerre, car le principe fondamental de l'islam c'est pou pas recourir à la guerre sans kit raison valable.

Même avec bane non-croyants, nous bizin faire preuve de bonté et d'équité, à moins ki zot rode détruire nous et nous la foi. Allah (swt) dire dans Quran: **“Allah pas défanne ou pou fer le bien et être justes envers bane ki pas fine combatte ou à cause de la religion et pas fine pousse ou de ou la caze. Allah certainement content bane justes [ki faire la justice, ki équitables].”** (Al-Mumtahanah 60: 9)

L'islam li ene religion de paix et croire en la co-existence pacifique, c'est-à-dire, ki tous dimounes, avec sakaine so la foi zot capave vive ensam dans ene société en paix. C'est pourquoi bane traités, bane pactes et bane alliances ti respecté et bane obligations ki ena suite à sa ti bizin rempli [accompli] zot fidèlement.

“Ô bane ki ena la foi, respecter zot bane l'engagements.” (Al-Maida 5: 2)

“En vérité, pou interroge zot lors bane l'engagements [ki zot fine faire].” (Al-Isra 17: 35)

Le droit international islamique et so bane préceptes zot fondé lor bane vérités humaines universelles. Bane tels préceptes capave appliquer à l'humanité en entier sans distinction de religion ou de race. Dans la conception de l'islam de l'ordre mondial, ene l'engagement ki l'État musulman et même saki kit musulman individuel prend capave lier toute la communauté [musulmane] dans sa promesse ou l'engagement là. L'islam permette à ene dimoune, même à ene esclave musulman – malgré ki nous tous nous bane esclaves d'Allah – pou donne so protection à ene l'ennemi et so l'engagement pou être respecté.

Le Saint Prophète Muhammad (saws) fine déclaré: *“Bane Musulmans zot ene [Un (1) – c'est-à-dire, zot ene sel les corps uni]. Bane pli pauvres d'entre zot capave lier zot tout [c'est-à-dire, toute l'Oummah] par zot l'engagement.”* Abu Ubaydah (ra) fine écrire ene jour au Khalifa [à sa l'époque là ki ti] Umar (ra) et li dire li ki ene

esclave ti donne ene gage de sécurité à bane habitants d'ene la ville de l'Irak, et sa dimoune là fine alors demande Hazrat Umar (ra) so l'opinion lors là. Hazrat Umar (ra) fine réponne: *“Allah fine enjoigne [ordonne] l'accomplissement de bane promesses et ou pas pou bane croyants si ou pas rempli ou bane l'engagements. Alors rempli ou bane promesses et laisse zot tranquille.”*

L'importance ki bane savants [bane juristes] attache à la réalisation de l'engagement li bien grand, à tel point ki la sécurité d'ene étranger pas pou être affectée, même si ene la guerre éclater entre l'État musulman et celui de sa étranger là. L'ambassadeur li considéré comme étant à l'abri de tout violation et li jouir de la liberté de religion. Li capave rentre dans so pays en toute sécurité.

L'Islam tolère lors so territoire, ene quantité de bane la lois, même celui de bane les autres religions et cultures et li donne zot ene pouvoir judiciaire ki autonome pour sak communauté [c'est-à-dire, kot sak communauté non-Islamique zot libre pou applique zot la loi religieuse, d'après zot constitution religieuse dans ene tribunal religieuse ki appartenir à zot propre la foi]. Ene étranger appartenir donc à la juridiction de so propre tribunal confessionnel. De plus, li gagne l'autorisation pou pratique bane coutumes ki strictement interdits dans l'Islam. La consommation de bane boissons alcolik, par exemple, li interdit à bane musulmans. Pourtant, ene non-musulman li jouir de la liberté, non seulement pou consomme l'alcol mais aussi pou fabrique li et vende li. C'est sa la tolérance de l'Islam ki cherche à établir ene l'ordre mondial ki fondé lors le principe de la co-existence pacifique [kot zot tout vivre en paix].

Anou demande nous-mêmes astaire si li possible pou adopter la loi religieuse comme la loi du pays. Aucaine la loi religieuse li pas complet et li ni internationale, excepter l'Islam. Aucaine la loi religieuse li pas aussi tolérant, respectueux et respectable ki celui de l'Islam, mais malheureusement, bane musulmans d'aujourd'hui fine moque de tous sa bane la lois là et zot fine prend sa couma bane la loi arriéré. Li pas impossible pou fer nous pays [chaque pays] marche d'après bane la lois Islamiques, mais sa bizin ene travail ki vini doucement doucement, sans aucune contrainte. Quand le monde pou marche vers l'Islam, alors bane la terres [pays] là pou être gouvernées par l'Islam, et tanque ki sa pas arriver, alors tous bane peuples, ki zot musulmans ou non, bizin respecter bane la lois de zot pays à moins ki pé ordonne zot pou faire le mal et la corruption [alors là, zot, fauder pas zot participe là-dans]. Dans bane les temps ki nous pé vive,

même si nous prend le nom d'Allah, mais li pas pou immédiatement possible pou nous pou **ORDONNE** à bane dimounes pou agir conformément à bane la lois de l'Islam, parski l'Islam, le vrai chemin de l'Islam interdit la contrainte dans n'importe ki forme que ce soit pour ki bane dimounes accepter li.

Malheureusement aujourd'hui, bane musulmans fine bien éloigné de l'Islam. Zot fine vine hypocrites. Même toute la société de l'homme fine vine hypocrite à l'égard d'Allah Le Tout-Puissant et de l'établissement de la vérité et de la justice lors la terre. Ena l'hypocrisie dans la politique et la société partout. Et l'hypocrisie pas permette à l'honnêteté pou prospérer. Sa pas permette à la parole d'Allah pou prend racine. C'est sa le problème principal.

Ki Allah permette nous dans nous l'époque pou travaille dur sous So direction pour amène ene réveil de l'Islam dans tous bane les cœurs, afin ki la société capave respire la fraîcheur de l'air de l'Islam, libre de kit corruption et de n'importe ki forme de contrainte en matière de la foi. *Ameen.*

Bane ki croire, zot pou croire zot par la permission d'Allah ! Sa li inévitable, et concernant bane ki détourne zot du message d'Allah, alors Allah suffit comme Juge et Témoin en saki concerne zot la foi.

وَالَّذِي أَنْزَلَ إِلَيْكَ مِنَ رَبِّكَ الْحَقُّ وَلَكِنَّ أَكْثَرَ النَّاسِ لَا يُؤْمِنُونَ ﴿٢﴾

Wallaziii 'inzila 'ilay-ka mir-Rabbikal-Haqqu Wa laa-kina 'ak-saran-naasi laa yu'-minuun.

Et saki fine révèle à zot par zot Maître c'est la vérité, mais la plupart de bane dimounes pas croire. (Ar-Raad 13: 2).